

30 de Xaneiro de 2021

Modificación da 'LEI DE COOPERATIVAS DE GALICIA' (Lei 5/1998)

Aprobáronse unha serie de modificacións para a Lei 5/1998, do 18 de decembro, de Cooperativas de Galicia, en aspectos relacionados coa asemblea xeral, a representación doutras persoas socias, ou as prórrogas dos nomeamentos dos cargos dos órganos sociais das cooperativas.

Aparecen publicados no DOG de 29 de xaneiro de 2021, na Lei 4/2021 de medidas administrativas e fiscais, CAPÍTULO VII Emprego e igualdade, Artigo 26.

Modificación da Lei 5/1998, do 18 de decembro, de cooperativas de Galicia

A Lei queda modificada como segue:

1| Os números 1, 2 e 3 do artigo 35 quedan redactados como segue:

"1. Con carácter xeral, a **assemblea xeral** terá lugar na localidade onde radique o domicilio social da cooperativa. Establécense as seguintes excepcións:

- a) Que se realice de forma telemática.
- b) Que a asemblea teña o carácter de universal, en cuxo caso poderá ter lugar en calquera localidade.
- c) Que nos estatutos se fixe outro lugar de reunión ou se habilite ao órgano de administración para fixar un distinto.
- d) Que por circunstancias sobrevidas, na localidade onde radique o domicilio social da cooperativa non exista un local que permita o normal desenvolvemento da asemblea en condicións de seguridade. O órgano de administración terá que motivar suficientemente esta circunstancia, así como a idoneidade da localidade escollida en termos de facilidade de comunicación respecto da localidade onde a cooperativa ten o domicilio social ou onde residen a maioría das persoas socias.

2. Terán dereito a asistir á asemblea xeral aquelas persoas socias que o sexan na data de realización daquela. A asemblea xeral quedará validamente constituída en primeira convocatoria cando estean presentes ou representados a maioría dos votos, e en segunda convocatoria cando estean presentes ou representadas, polo menos, persoas socias que teñan o 10% dos votos ou 100 votos.

Para a segunda convocatoria os estatutos sociais poderán fixar un quórum superior, sen superar o establecido para a primeira. Tamén poderán establecer que, calquera que sexa o número de persoas cooperativistas presentes ou representadas na asemblea, esta quedará validamente constituída na segunda convocatoria.

Serve acadar estes quórums ao comezo da sesión para que a presidencia a declare validamente constituída.

3. As reunións da asemblea xeral poderán desenvolverse integramente por videoconferencia ou outros medios telemáticos que permitan a participación a distancia, ou de forma mixta (presencial e por medios telemáticos), sempre e cando todas as persoas que deban ser convocadas teñan posibilidade de acceso. Na convocatoria determinaranse os prazos, as formas e os modos de exercicio dos dereitos por parte das persoas que asistan telematicamente á asemblea.

Cando se convoquen reunións da asemblea xeral para a súa realización por medios telemáticos, o órgano de administración deberá adoptar as medidas necesarias para garantir:

- e) A verificación da identidade das persoas asistentes.
- f) A acreditación da representación coa que actúan, de ser o caso.
- g) O exercicio do dereito de participación con voz e voto, segundo proceda.
- h) O sentido dos votos emitidos e o seu cómputo, tendo en conta o voto plural cando proceda.

i) O segredo dos votos, cando deban ter tal carácter.”

2| O número 8 do artigo 36 queda redactado como segue:

“8. Aínda que os estatutos non o prevexan, **as persoas socias poderán facerse representar por outras persoas socias**. Unha mesma persoa poderá actuar en representación de ata dez persoas socias.

No caso de que a persoa representante asista á reunión de forma presencial, a representación acreditarase mediante autorización por escrito autógrafa ou poder especial suscrito polo representado ou representada. No caso de que participe por medios telemáticos, a convocatoria deberá establecer a forma na que se debe acreditar a representación.

En calquera caso, a representación debe outorgarse para cada asemblea, e debe ser verificada polo órgano de intervención da cooperativa ou, na súa falta, pola presidencia e a secretaría”.

3| O número 1 do artigo 39 queda redactado como segue:

“1. Os estatutos poderán prever que as **competencias da Asemblea Xeral** se exerzan mediante unha asemblea de segundo grao, integrada polos delegados designados en xuntas preparatorias.

Aínda que os estatutos non o prevexan, tamén se poderá aplicar esta modalidade cando nunha cooperativa concorran circunstancias que dificulten a presenza simultánea de todas as persoas socias na asemblea xeral. O órgano de administración xustificará de forma suficiente estas circunstancias e establecerá os criterios de adscrición das persoas socias ás xuntas preparatorias, que se comunicarán xunto coa convocatoria.”

4| Engádesse unha disposición adicional décima coa seguinte redacción:

“Disposición adicional décima. Non existencia de **quorum en segunda convocatoria** Excepcionalmente, ata o 31 de decembro de 2021, e con independencia da modalidade de realización da reunión, as **assembleas xerais** das cooperativas ás que lle sexa de aplicación a Lei 5/1998, do 18 de decembro, de cooperativas de Galicia, quedarán validamente constituídas en segunda convocatoria calquera que sexa o número de cooperativistas presentes ou representados, aínda que os estatutos non o teñan establecido.”

5| Engádesse unha disposición adicional décimo primeira coa seguinte redacción:

“Disposición adicional décimo primeira. **Prazo para a realización de asembleas xerais e prórroga dos nomeamentos**

1. As asembleas xerais das cooperativas ás que lle sexa de aplicación a Lei 5/1998, do 18 de decembro, de cooperativas de Galicia, que deberan ter lugar nunha data posterior ao 14 de marzo de 2020 e que non se puideron realizar en cumprimento das medidas ditadas para facer fronte á pandemia da covid-19, poderán celebrarse con data límite do 31 de decembro de 2021.

2. Aqueles **nomeamentos para cargos dos órganos sociais** das cooperativas ás que lle sexa de aplicación a Lei 5/1998, do 18 de decembro, de cooperativas de Galicia, cuxa vixencia finalizase despois do 14 de marzo de 2020 entenderanse prorrogados ata o 31 de decembro de 2021, sen prexuízo de que poidan ser renovados ou cesados en calquera momento anterior polo órgano competente.”

3. As modificacións previstas no número anterior serán aplicables directamente ás cooperativas con independencia do que dispoñan os seus estatutos. Non obstante, **cando se pretenda modificar os estatutos vixentes estes deberán adaptarse integramente ao disposto nesta lei**.